

四庫全書

子部

欽定四庫全書

子部

續名醫類案卷三十三

詳校官大醫院恩糧臣孔毓秀

編修臣倉聖脈覆勘

總校官編修臣王燕緒

校對官中書臣劉源溥

謄錄監生臣陳箴

欽定四庫全書

續名醫類案卷三十二

錢塘魏之琇撰

崩漏

薛立齋治一婦人性急每怒非太陽耳項喉齒胸乳作
痛則胸滿吞酸吐瀉少食經行不止此皆肝火之症
肝自病則外症見土受剋則內症作先以四物加白
朮茯苓柴胡炒梔炒龍膽清肺養血次用四君加柴

胡白芍神麴吳茱萸炒黃連以培土制肝漸愈惟月經不止是血分有熱脾氣尚虛以逍遙散倍用白朮茯苓陳皮又以補中益氣加酒芍兼服而安

一婦人懷抱不舒腹脹少寐飲食素少痰涎上涌月經頻數薛曰脾統血而主涎此鬱悶傷脾不能攝血歸源耳用補中益氣濟生歸脾而愈

一婦人血崩兼心痛三年矣諸藥不應每痛甚虛症悉具面色痿黃薛曰心主血蓋由去血過多心無所養

以致作痛宜用十全大補湯參朮倍之三十餘劑稍愈百餘劑全愈

大尹王天成之內久患崩自服四物涼血之劑或作或輟因怒發熱其血不止服前藥不應乃主降火更加脇腹大痛手足俱冷薛曰此脾胃虛寒所致先用附子理中湯體熱痛止又用濟生歸脾補中益氣二湯崩血頓愈若泥痛無補法則誤矣

錦衣楊永興之內患血崩過服寒涼之劑其症益甚更

加肚腹悶痞飲食不入發熱煩躁脉洪大而虛薛曰
此脾經氣血虛而發躁也當急用八珍湯加炮薑以
溫補之緩則不救不信仍服止血降火之劑虛症蜂
起始信其言緩不及治矣

一婦人因怒崩血久不已面青黃而或赤此肝木制脾
土而血虛用小柴胡合四物清肝火生肝血又用歸
脾補中二湯益脾氣生肝血而瘥此症若因肝經風
熱而血不寧者防風為丸以兼症之藥煎送或肝經

火動而血不寧者炒條苓為丸以兼症之藥煎送若
瘀血為患用五靈脂為末燒銕器淬酒調服無不効
者

周暉內人病血山崩諸醫皆危之劉春齋用當歸一兩
荊芥一兩酒一鍾水一鍾煎服立止如神

續金陵
瑣事

易思蘭治一婦患崩晝夜十餘次每次去血升許用止
血藥愈甚卧牀月餘羸瘦食少面青爪黑氣促痰喘
診之心脉平和肝脉弦大時一結肺脉沉而大且有

力脾胃脉沉濇兩尺沉而無力曰此氣鬱病也詢之
果因午餐小婢忤意發怒構疾隨以四神散與之服
藥半盂未及一時頓覺神爽易曰未也明日子時分
指甲變桃紅色方可救至期甲色果紅復診之左三
部如前肺脉微起脾胃雖沉緩而不濇二尺仍舊謂
其家曰午時血當大崩毋得驚惶以駭病者至期果
然下紫黑血塊數枚自此遂止後用壯真五和丸調
理月餘全愈次年生子方用四神散以香附行氣為

君烏藥為臣蘇梗通十二經之闕竅白芷化腐血生
新血為佐加當歸引氣入心而生新血川芎引氣入
肝舒肝之鬱而去舊納新神麴引氣入脾暢脾結而
統新血白朮健脾胃而和中氣為使以行氣為主活
血輔之此治血先調氣之法也

吳寧先治俞氏婦血淋念載已成痼疾因幼孫出痘危

險忽下血兩晝夜不止汗瀉交作暈數次

思慮恐懼
三陰並傷

也脉向弦大而革者忽變而數疾欲脫奄奄一息用

人參黃耆各一兩製附炮薑棗仁各三錢五味龍骨
各一錢或疑附子太熱且謂何不用血藥曰血脫補
氣古人精義謂有形之血不能速生幾微之氣所當
急固又脾胃氣血俱喜熱而惡寒薑附宜服也二劑
脉漸轉前方加歸芍等血藥症已除然脉氣不強非
三年調攝未易復也自後參耆不輟計服補劑六百
餘帖膏丸數料而起并宿疾亦瘳

一婦半月前小產繼以血崩舌硬心搖汗出髮潤日夜

俱熱耳閉不聞目視不見身浮浮如在舟車六脉細
數欲脫用人參二兩黃耆二兩白朮一兩熟地二兩
當歸五錢炮薑製附棗仁各三錢龍骨一錢五分一
劑頓減二劑精神爽慧

陸養愚治王笠雲母年四十九經事已止半年一日忽
暴至不止昏暈厥逆脉之兩手沈微如絲急以八物
湯加附子薑灰煎灌之半時方醒連進二大劑乃止
十之七八至十劑六日方止後數月復崩亦昏暈或

以犀角地黄湯加藕節阿膠之屬不止脉仍沈弱以附子乾薑鹿茸俱燒存性同釜底墨酒調服之即止後以六味加四物料服之約二斤一年不作次年八月間又暴至昏暈更久脉之如舊仍以八物湯加附子連進二劑昏暈自晡至晚未醒咸謂必死診之決其必甦蓋氣血暴脫一時至未能與胃氣相迎耳或投以牛黃丸至半夜人事稍省而血尚未止明早復診之仍判八物湯少加薑附二劑或適至云昨夜之

甦乃牛黃丸之功公實不知也向因屢服參附致屢
崩今人事既省斷宜順氣行瘀去其病本豈可復蹈
前轍曰昨早投大補之藥即不服牛黃丸亦甦此等
脉症急宜續投參耆少緩恐成不救況可更以他藥
乎或乃怫然而去曰讀父書而坑趙卒天下每多此
人陸令先服煎劑隨製存性附子等灰午後人事更
爽進粥晚投末藥一服夜間血少止明日又湯散並
投血遂止再服前湯十劑而瘳

立齋治一婦人飲食因怒忽患血崩四肢逆冷抽搐口
禁如發瘧然吐痰如涌灌以二陳柴胡山梔枳殼吐
出酸味神思稍醒藥止次日進薄粥少許但乳脇脹
痛此悉屬肝火熾盛致脾氣不能運化先用六君柴
胡山梔鉤藤諸症頓退惟四肢不遂血崩如初或又
為肝火未息欲投清肝涼血之劑此肝脾氣血俱弱
先用補中益氣湯培其脾土而血氣歸經又用四物
參朮柴胡養肝經而四肢便利

餘見異
症名要

一婦人月經淋瀝無期作鬱怒傷肝脾虛火動而血不歸經乃肝不能藏脾不能攝也當清肝火補脾氣與歸脾湯逍遙散二藥四劑而愈

一婦人因怒經事淋瀝半月方竭遇怒其經即至甚則口噤筋攣鼻衄頭痛痰瘕抽搦上視作肝火熾盛以小柴胡加鈎藤黃連熟地山巵而愈

王執中治皮匠妻患血崩兩月飲食不進與鎮靈丹服少減而未斷因檢得耆域方如聖散用椶櫚烏梅乾

薑各一兩煎燒存五分性為末每服二錢食前烏梅湯調下合一劑與服而疾平患甚者不過三服

資生經

有巡撫夫人年踰五十因傷寒而血崩與膠艾四物湯一服漸愈後因勞復大作與鎮靈丹十五丸而止或無此丹燒鹿角存性為末酒調服亦佳屢驗

全上

陳良甫治一婦人崩漏暴下諸醫投薑附桂等藥服之愈甚診之六脉緊數遂用金華散兼局方龍腦雞蘇丸數服即安本事方單用黃芩者亦此意也

良方

一親戚婦人年四十五經年病崩漏不止面黃肌瘦髮黃枯槁語言聲嘶服諸藥無効診之六脉微濡問服何藥云凡是當歸川芎活血諸品丹藥服之皆不作効遂合溥濟方伏龍肝散兼白礬丸服之愈

全上

繆仲淳治董清山夫人患血崩由于中年鬱怒百藥不効用大劑參耆令覓胎髮百餘丸火煨調入藥服久之漸愈煨髮用小砂罐鹽泥煉極熟將髮入罐中封固陰乾以炭火圍之俟黑烟將盡即起若青烟出髮

枯不可用矣非細心人不可任蓋火候不可過也

王肯堂曰徐朝奉傳其內人有血崩症服諸藥不效用

香附炒為末每服二錢米飲調下服後遂痊

未選入

一親戚黃卿內子凌夫人忽苦血崩百藥不效用五靈脂一味不拘多少炒令烟盡研末每服一錢溫酒調下旋服遂安

蔣仲芳治毛氏婦經來淋瀝不斷已徑三月涼血止血之藥服至五六十劑不效而口乾唇燥愈甚脉來微

滋詢其大便必瀉果然即以四君子湯加熟附炮薑
熟地血餘二劑而止蓋寒客于中火浮于上脾虛而
不攝血故淋瀝不已也

聶久吾婦年三十九生子月內調養未善次年春其經
兩月餘不行一日忽暴至不止一二飯久即昏暈不
省人事急用十全大補湯去桂倍加參耆又加熟附
子炒乾薑各一錢灌之甦省後連服二大劑遂止十
之七八又十餘日共服二十餘劑乃得全止次年春

崩又大作比前尤甚昏暈更久又服前方三十餘劑
尚未全安後用鹿茸炒燒存性研末酒調二錢服數
次而血止繼服峻補丸藥幸年餘不發然病根未除
次年中秋忽又暴至前方連服二大劑血流如水涌
吐冷痰至日晡昏暈初更而氣絕惟胸次微溫至三
更用灶心土研細水調灌一二酒杯冷痰少開遂飲
滾湯一瓊甦省漸安豈初發時服大補二劑能令生
意不絕耶後又服峻補之劑而血止因思三年之內

嘗服峻補丸藥而病仍大作者何也或謂補血太過

是以積而成崩或謂不宜用附子等熱藥推動其血

遂至于崩

此說極是惜崩君未及明

抑知土虛不固然後山崩今

既血崩則是血大虛且血氣相依附氣虛甚則降令

多升令少是以不能攝血致血不歸經而妄下不惟

大補血而尤當大補氣也前丸方雖峻補不合攙入

香附益母砂仁元胡等損氣之品乃令病根不除而

屢作也因純用補氣血藥一料而神氣爽健二料而

病根除次年遂孕而生第八兒矣

劉氏媼年七十病血行如壯年月事久之淋漓不斷兩
月餘耳鳴心跳頭暈目眩惡食罕眠奄奄就斃醫者
不一有與歸脾補中者六味四物者十全八珍者諸
治未為無見然服歸脾補中則上膈脹而面腫似不
宜于補氣服六味四物則小腹脹而足腫似不宜于
補血服八珍十全則中脘脹而氣急似氣血兼補又
不宜延診先告以不宜用補以症皆緣補而增也脉

之沉小而溢兩關尤甚且無神曰此肝脾兩傷之候
也以七旬之年兩月之病非補何以能瘳第余之補
異乎人之補無慮也與熟地二兩以一兩炒炭杞子
一兩白芍炒棗仁炒各五錢酒連三分四劑而淋瀝
止去連四劑而腫脹消諸症亦愈

姚氏婦早寡年三十餘因月事暴至遂崩漏不止勢甚
猛脉之兩寸上溢兩尺甚弱據脉不可與補中益氣
據症又不可不暫升提以挽其下陷先與熟地杞子

白芍藥仁重劑服之果不應急以草麻仁十數粒去
殼研入麝一分捏作餅子用綠雲膏貼臍上再服前
藥血去漸緩少頃再服藥覺血不行即令揭去之又
服數劑全愈

白帶

朱丹溪治陶適外姑年七十形瘦善啖白帶食前薑湯
吞大補丸五十九一二次午膳後及臨卧時各與小
胃丹十五丸愈

胡安人白帶下月經甚多食少倦怠面黃經中如有血塊者有如筋膜者與參朮等補血氣調脾胃後諸症皆退惟帶未止以樗皮丸主之

薛立齋治一婦人帶下四肢無力薛曰四肢者土也此脾胃虛弱濕痰下注以補中益氣濟生歸脾二藥治之而愈

孫文垣治吳涌瀾母年六十餘久患白帶歷治不効變為白崩診得右寸滑左寸弱兩關濡兩尺軟弱據脉

心腎俱不足中焦有濕古云崩中日久為淋帶漏下
多時骨亦枯今白物下多氣血日敗法當燥脾兼補
心腎以既濟丹補其心腎以斷下九燥中宮之濕則
萬全矣果未終劑而愈

一僧治蔡大尹內人崩中赤白帶下用墓頭回一把酒
水各半盞童便半盞新紅花一捻煎七分卧時溫服
日近者一服久則三服愈

董炳集
驗方

一婦人小腹痞脹小便時下白帶小水淋瀝此肝經濕

熱下注用龍胆瀉肝湯而愈

一女人赤帶腰痛以四君子加乾薑肉桂地榆而愈男
子腰痛亦效

一婦人赤白濁腰痛四君子加當歸杜仲續斷乾薑地
榆而愈

王海藏云李知府妻梅氏帶下病七年血崩不止骨痠
著牀日服紫堯丸五九至十九十五九取下膿血五
升黃水一升肉塊如雞子狀始愈

方見癰
風門

王教授云有來覓赤白帶藥者予以鎮靈丹與之鎮靈丹能活血溫中故也以其神效故書于此但有孕不可服者若交帶脉穴尤奇于此丹也

資生經

一婦人白帶兼病痛風半夏茯苓川芎陳皮甘草蒼朮

米泔浸

黃柏

酒洗晒乾炒

南星牛膝

酒洗

煎服

全上

蕭萬興治龔氏妾年三十婉未百日恣啖生冷嘔吐臍痛病白帶月餘行經衝任冒寒發熱煩渴赤帶頻下脉沉遲無力此內真寒而外假熱症也用四物二陳

加炮薑肉桂木香少佐升麻丸服月餘而愈

一寡婦年三旬時或增寒發熱通宵不寐時或經晝昏
睡喃喃獨語過勞肢體厥冷每用薑蔥解表遂致停
熱脾胃乘虛下注而患赤帶脉沈伏重按搏指以為
相火蘊結外假寒而內真熱也用四物加黃連龍胆
炒卮知母茯苓木通投八劑諸症悉安

來天培治一婦年四旬外苦于白帶朝夕常流不止已
十餘日矣外症頭暈腰痛診其脉澁此肝腎陰虧氣

虛下陷所致法宜以十劑中滋可去脫之劑治之否
則因循慮成弱症矣以六味飲去萸肉澤瀉加牡蠣
龍骨川斷肉桂杜仲白芍鹿角膠不數劑而瘳

一閨女年十五歲夏間患白帶月餘更兼腹痛診之六
脉俱弦細而數按之中指下極沉此屬脾氣下陷肝
藏濕熱為患同升麻柴胡蒼朮白朮茯苓半夏廣皮
甘草黃柏黃芩二劑而霍然

交腸

交腸症男
子亦有

張路玉治詹石匠婦產後五六日惡露不行腹脹喘滿
大便從前陰而出省其故平日酷嗜烟酒所產之兒
身軟無骨因而驚駭遂患此症以芎歸湯加蒼朮肉
桂炒黑山查一服惡露通而二便如常

陸聖祥之女方四歲新秋患血痢而稀糞出于前陰作
冷熱不調食積治與五苓散服香連丸二劑而愈

錢吉甫女年十三體肥痰盛因隣家被盜發熱頭痛嘔
逆回青六脉弦促而便溺易位此因驚而氣亂痰壅

竅端所致也與四七湯下礞石滾痰丸開通痰氣而
安

喻嘉言治姜宜人得奇症簡本草經疏治交腸用五苓
散之說以為神秘喻曰交腸一症大小二便易位而
出若交易然古用五苓治之專為通前陰而設也若
此症閉在後陰二便俱從前陰而出擬之交腸誠有
似是而非者况交腸乃暴病驟然而氣亂於中此症
乃久病以漸而血枯於內有毫釐千里之別原夫疾

之所始始於憂思傷脾脾傷則不能統血而錯出下行有若崩漏實名脫營宜大補急固乃誤以涼血清火為治脫出轉多於是乎陽明之血亦漸消今乃大腸枯槁幽門驟閉飲食至此無庸分別遂清濁并走前陰勢必大腸復通令渣滓率由故道斯為得耳與五苓一方有何干涉況五苓一方又為亡已血所深戒乎向診時嘗問病中多哭泣否答曰時時泣下乃知臟燥者多泣大腸方廢而不用也交腸云乎哉今

大腸之脉累累而現於指可虞之時其來春棗葉生

乎棗葉生而言果驗

按此仍是交腸症惟與驟然氣亂者不同耳

愚擬治

之之法宜集靈膏重用人參以補其肺而潤之蓋肺與大腸相表裏而主氣又肺者相傳之官治節出焉肺得養斯大腸之燥可清又得枸杞二冬以滋其失血之槁然後故道可復而清濁自分矣

薛立齋治一產婦小便出糞名大小腸交乃氣血俱虛失行當道先用六君子湯二劑又用五苓散二劑而

痊

婦人良方作先用五苓散二劑而愈又用補中益氣湯而安

沈明生治葉惟和室月夜探親其母留之食時春寒獨峭歸途即覺肌膚凜慄次早復當窓梳櫛重感于邪無熱惡寒胸膈悶一醫見其肌表無熱竟作食傷太陰主治遽用大黃下之不特不見效反致水道閉澁尤可異者白物腥穢如膏淋之壯從大腸來綿綿不絕漸致肌體萎弱骨立難支診之脉沉而澁虛寒可知計惟有溫中益元之法然慮大便尚結小水未

行或增滿之患遂先用五苓散倍加肉桂一服而水道果通再服而宿垢并下嗣用附子理中湯三四劑後白物漸止更以十全大補調理一月而安夫白淫白沃載在靈蘭之典皆指前竅中來今乃轉移于後何也蓋此病始終是一寒症初因食在胃脘之上火衰不能熟腐而反下之太早則有形之物不能即降而無形之寒抑遏于關門之際遂致清濁混淆涓涓不息似乎淋帶而實非淋帶也今先以五苓分利陰

陽而倍肉桂使寒隨溺洩上下宣通繼以理中之劑
撤其餘邪鼓其陽氣令脾土熱燥而濁流有制宜其
效如桴鼓也夫始用行大便之藥大便不行并致小
便亦澀今用利小便之藥小便即利并致大便亦通
其得失為何如哉

求子

建平孝王妃姬侍皆麗無子擇良家未笄女入御又無
子問尚書褚登曰求男有道乎澄對曰合男女必當

其年男雖十六而精通必三十而娶女雖十四而天
癸至必二十而嫁皆欲陰陽完實然後交合則交而
孕孕而育育而為子堅壯強壽今未笄之女天癸始
至已近男色陰氣早泄未完而傷未實而動是以交
而不孕孕而不育育而子脆不壽此王之所以無子
也然婦人有所產皆女者有所產皆男者大王誠能
訪求多男婦人媒至官府有男之道也王曰善未再
期生六男夫老陽遇少陰老陰遇少陽亦有子之道

也褚氏遺書

朱丹溪曰肥盛婦人不能孕育者以其身中脂膜閉塞
子宮而致經事不行可用導痰湯之類瘦怯婦人不
能孕育者以子宮無血精氣不聚故也可用四物湯
養血養陰等藥余姪女形氣俱實以得子之遲服神
仙聚寶丹背上發癰疽症候甚危予診其脉散大而
瀋急以加減四物湯百餘貼補其陰血幸其質厚易於
收救質之薄者悔將何及

龔子才治劉小亭年四十無子陽事痿弱精如冰冷求
診兩寸脉洪兩尺脉沉微無力此真元衰憊乃斷喪
過度所致以固本健陽丹加人參附子枸杞覆盆子
各二兩製一料服盡覺下元溫暖如前又製一料服
至半料而乃正果孕生一子後傳之於劉柏亭劉敏
菴服之俱得子

汪石山治一婦人形肥色淡紫年幾三十艱於育子脉
之兩尺皆沉微法當補血以形言之肥人氣虛亦當

補氣遂令多服八物湯仍以補陰丸加參耆空腹吞之三月餘有孕復為診之兩尺如舊以理論之孕不當有昔人云脉難盡憑殆此類歟

薛立齋治儒者錢思習子室年三十餘無嗣月經淋瀝無期夫婦異處幾年矣思習欲為娶妾以謀諸薛薛意此鬱怒傷肝脾虛火動而血不歸經乃肝不能藏脾不能攝也當清肝火補脾氣遂與加味歸脾逍遙二藥四劑送至其家仍告其姑曰服此病自愈而當

受胎妻可無娶也果病愈次年生子

后妃不妒忌而百斯男獨中山靖王飲酒好內生子百
十二人世稱全鹿丸為周文王所定常服之故生子
衆多豈中山靖王亦常服是丸者耶何生子之多于

文王也

張氏
卮言

馮楚瞻治金紹老晨瀉不已就診按其脉兩寸關俱沈
弱無力兩尺沉微更甚曰少年得此不惟難愈更恐
嗣育之間多女少男矣造許某至亦索診其脉亦然

各道連生數女而無子令以八味去丹皮澤瀉加補
骨脂三兩兔絲子四兩五味子二兩早晚食前各服
五錢後各生子矣精要云久服令人肥健多子信然
吳孚先治蔡孝廉年已五旬苦乏嗣徧求種子方備嘗
十載無一驗診得右尺神旺真火本自不衰惟左尺
虛弱乃真水乾涸也宜補陰配陽與六味地黃丸加
元武膠越二載果得一子

萬密齋曰嘗見男子陰痿者多致無子不可不慮也惟

其求嗣之急易為庸醫之惑或以附子赤石脂為內
補或以蟾酥呵芙蓉為外助陽事未興內熱已作玉
莖雖勁頑木無用以致終身無子或有天殁者吾見此輩
無辜而受醫藥之害遍訪諸方無越此者出以示人
名曰壯陽丹熟地黃四兩已戟去心破故紙炒各二
兩仙靈脾一兩桑螵蛸真者鹽焙陽起石煨另研水洗各半兩
上六味合陰之數研末煉蜜丸如桐子大每三十丸
空心只一服溫酒下不可恃此自恣也戒之

生地四兩熟地四兩天冬四兩麥冬四兩當歸二兩枸
杞一兩仙靈皮八兩剉碎絹袋浸大罈酒內隔湯煮
從卯至酉取水埋地下七日夫婦日共飲五六杯婦
人經水不准者即准而受孕此方刻鄒南皋仁文書
院集驗方中扶銀臺徐光祿俱云往往得驗因腹記

而筆之

李日草六
硯齋筆記

吳橋治胡醫卿胡喜詠諧故與橋習則以久不宜子請
壯陽方橋診曰公寸脉洪尺中沉澁火炎而不降水

涸而不升水火不交是曰未濟法宜滋陰補腎庶幾
相濟相生倘復壯陽則火益炎而水益涸咳血嘔血
將不可謀殆矣胡大笑曰吾五十而善飲彊飯不異
丁年何病徒以陽痿精滑願得方藥壯之且吾斗滋

陰藥如奉漏卮無益橋曰技止此爾胡後遇邑人老
而舉子者得壯陽方至留都亟服之咳而失聲已復
咳血久之肉削大洩浸動則遣使逆橋橋謝不暇病
深請告歸即召橋歎曰不用公言至此矣幸脉不數

聲不啗骨不蒸血不歟獨大洩日三四行爾橋曰否
否夫數者啗者蒸者歟者則陽火未熄猶可鼓而行
之今熄矣即爐鞴無及也無何而絕

妊娠

王顯字世榮文昭皇后之懷世宗也夢為日所逐化為
龍而遶后后寤而驚悸遂成心疾文明太后勅召徐
譽及王顯等為后診脉徐譽言是微風入臟宜進湯
藥及加鍼灸顯診云按三部非有心疾將是懷孕生

男之象後果如言

汪石山診一婦形長色紫妊五月矣求脉之以別男女
汪曰脉右大於左脉訣云左大為男右大為女今脉
右大當是女耶彼則喜曰我男胎矣往歲有妊時尊
甫先生診之亦謂右脉浮大當是女孕後生男今妊
又得是脉可知為男矣後果生男汪曰脉書但道其
常莫能盡其變此醫所以貴乎望聞問切也

張子和診一婦人年四十餘得孕自以為年衰多病故

疾復作醫亦不察加燭針於兩臍旁又以毒藥攻磨
轉輾腹痛食減形羸已在牀枕張診其脉曰六脉皆
平惟右尺洪大有力此孕脉也兼擇食為孕無疑左
右皆笑之不數月生一女兩目下各有燭針痕幾喪
其明凡治病婦當先問孕不可倉卒

鬚王之妻病臍下積塊嘔食面黃肌瘦而不月或謂之

乾血氣治之無効張視之曰孕也其人不信再三求

治乃與之平藥以應其意

妙否則別求人治或致悞事

終不肯下

毒藥

凡攻病之藥皆曰毒

後月到果胎也問何以別之曰尺脉

洪大也

亦有尺脉微弱而孕者見求子門汪石山案

素問陰陽別論所謂

陰搏陽別之脉

崑山周知縣景星家一婦病腹中塊痛希科診之曰氣

積投以疏氣破積之劑又命人以湯餅軸擊之不效

聞有巫峯神廟頗靈往問之云此胎氣也勿用藥信

之彼果生一男南京戶部主事韓文光妻病腹中作

痛按之若有物在臍左右者適浙中一名醫至京請

診之云是癰疽服三稜蓬朮之劑旬餘覺愈長亦以其不效乃止後數月生二男此皆有命而然可不慎

哉

客中
開集

程世光治一有胎婦兒腹啼皆不治乃傾豆於地令婦

低頭拾之兒啼止

江西
通志

萬密齋曰兒啼腹中此症臨月將產婦人有之師母錢

氏嘉靖戊子有娠九個月兒在腹中哭錢大驚令作

男子拜而止之過二十日生師兄邦孝

師母以下似
萬門人語邦

孝似萬
之子

李有懷妻高氏懷妊二十七月舉子後亦長成

雲問
雜誌

朱丹溪曰懷孕愛物乃一臟之虛假如肝臟虛其肝氣

止能養胎無餘用也不能榮肝肝虛故愛酸物

治法

邢氏亡其名朱勝非婦偶小疾命視之曰小疾爾不藥

亦愈然不宜孕孕必死其家以為狂言後一歲朱婦

得男其家方有抱孫之喜彌月婦疾作急召之堅不

肯來曰去歲已言之無可療之理越宿而婦卒人共

奇之

錢塘縣志

妊娠胎不長

薛立齋治一妊婦胎六月體倦嬾食面黃晡熱而胎不長因勞欲墜此脾氣不足也用八珍湯倍參朮茯苓三十餘劑胃漸健胎安而長矣

一妊婦因怒寒熱往來內熱晡熱脇痛嘔吐胎之八月而不長此因肝脾鬱怒所致用六君加柴胡山梔枳殼紫蘇桔梗病愈而胎亦長矣

妊娠胎動

薛立齋治鴻臚張淑人痢疾後胎動心神不安肢體殊倦用八珍散二十餘劑漸愈因勞加煩熱頭痛以大劑補中益氣湯加蔓荊子治之熱痛頓止仍用前散又五十餘劑而安其後生產甚易

一妊婦八月胎欲墜如產卧久稍安日晡益甚此氣血虛弱朝用補中益氣湯加茯苓半夏隨愈更以八珍湯調理而安

一妊婦小腹作痛其胎不安氣攻左右或時逆上小便
不利用小柴胡湯加青皮山梔清肝火而愈後因怒
小腹脹滿小便不利水道重墜胎仍不安此亦肝木
熾盛所致用龍膽肝湯一劑諸症頓愈乃以四君子
加柴胡升麻以培脾土而安

孫文垣治張溪亭子室妊已七月夢見亡過祖母揮拳
背打一下即覺胎動不安血已下大小便皆急腰與
小腹脹痛者五日診之兩寸俱短弱此上焦元氣大

虛當驟補之人參阿膠黃耆白朮各二錢當歸白朮
條苓杜仲各一錢砂仁香附各五分芎根嫩皮三錢
蔥白六錢一劑而血止再劑諸症悉除四劑後減去
蔥白芎根調理旬日足月產一女

吳孚先治孫氏婦妊六月作瀉欲小產診之曰此水胎
也四君子加炮薑製附十餘劑而安

陳三農治一孕婦腰痛甚如欲小產用杜仲一兩薑汁
拌炒續斷一兩二味為丸白湯送下遂安

薛立齋治一婦八月胎下墜或動面體倦飲食少思此脾氣虛弱用補中益氣湯倍白朮加蘇梗三十餘劑而安產後眩暈胸滿咳嗽用四物加茯苓半夏桔梗而愈

一妊婦內熱晡熱或兼寒熱飲食少思其胎或下墜或上攻此肝經血虛而火動耳先用加味逍遙散數劑次用六君子加柴胡枳殼各數劑而愈

一婦人每胎三四月作痛欲墜此為痛胎用當歸二錢

熟地黃三錢而愈

妊娠

子懸即胎上
逼也附子滿

薛立齋治一妊婦每因恚怒其胎上逼左關脉弦洪乃
肝火內動用小柴胡加茯苓枳殼山梔而愈但體倦
不食用六君子加枳殼柴胡山梔而瘥

孫文垣治費少垣乃眷妊已九月痰多喘嗽胎氣上逆
眼撐不起兩太陽微疼此子懸症兼痰火也以大紫
蘇飲為主纔服一帖即不上逆胸膈頓寬唯喘咳不

止與七製化痰丸而安

陸祖愚治梅養中子婦孕七月其夫出外經商患胎上衝心不時昏暈或與紫蘇安胎飲數劑不效脉之寸大於關關大于尺俱帶弦數此血虛極而火上炎之故也用清氣養榮湯磨沉香四兩牛黃二分煎就徐徐灌之不終劑而甦矣

蔡元度寵人有孕夫人怒欲逐之憂悸成疾乃取香朮散用莪朮煨二錢丁香一錢甘草三分共為細末分

作三服空心鹽湯調覺胸中如物推下之而愈

芥蜜齋

廣嗣
紀要

萬密齋治徐太和之妻娠八月得子滿病或作子懸治
不效腹滿轉甚胎墜下迫玉門大張脆形外露但仰
卧不能坐其脉兩手俱大堅搏指謂曰病無害乃雙
胎也胎肥氣弱

妊娠子腫

一孕婦遍身皆腫或以為白火疸或以為鼓脹治俱不

效產科郭大生曰此名琉璃胎至將產一月前必飲食大進產即腫消矣而果然彼蓋開歷多故耳然病之所以然究未之知也

一婦人孕七月先下體發腫漸及面目數月忽子戶內突出一水泡皮薄而光亮於是身腫悉消矣然起卧不便困苦非常後復皮破出水恆不得乾偶一內親自言昔嘗患此有醫教用王不留行及明礬等藥煎洗而痊如言試之苦於螫痛如此月餘此前稍愈而

終不除詢產科亦罕知者但云此似不妨必所謂琉璃胎也產時自消後果然

全上

一孕婦適身發腫既產仍不消只向裡牀卧終日昏迷不省人事有時少醒即又狂躁不寧如此二十餘日絕口不食諸醫束手偶有村媪聞而告曰無憂我兒媳亦曾如此不餓死也但用陳年白鯊向病人前炙熱以米醋沃之彼聞香自然欲食如言果愈腫亦遂消

全上

又見婦人胎腫如欲產之勢皆由氣血虧竭

不能束約故下墜耳用束胎和氣主之加人參一錢
升麻炒三分服三劑胎復上而安後生一男一女

楊乘六治我修姪婦妊八月一日胎忽上搶塞至心口
喘滿不食自汗悶絕僵卧口噤目直視面色不赤舌
色不肯按其兩手脈息尚有急取丸子兩許滾水研
化灌之灌至兩酒杯胸口鬆動口開睛轉手足運動
而甦問何藥乃爾神曰八味丸也又問此何病而用
此丸曰此子懸也由下元虛冷中無火以養嬰兒故

上湊以就心火之熱如人睡被中足冷則上縮也後用蒼朮芎歸煎送前丸服至兩月而產

未選

薛立齋治一妊婦每胎至五月肢體倦怠飲食無味先兩足腫漸至遍身後及遍頭面此脾肺氣虛朝用補中益氣湯夕用六君加蘇梗而愈

元豐中淮南陳景初名醫也獨有方論治妊婦子腫病其方初謂之香附散李伯時易名曰天仙勝散王荊公居金陵舉家病以詩贈景初曰舉族貧兼病煩君

藥石功到家何所有一一問征鴻因此見方得于李
伯時家傳方錄于臨川張右丞宅

薛立齋治一婦子腫用紫蘇飲三服而愈

轉脬

鍾大延治一貴家孕婦小便秘腫脹面赤發喘衆醫莫
效大延診之曰是可弗藥乃胎壓膀胱耳令其周身

轉運而瘳

寧波府志

孫卓浮梁人工精岐黃正德間邑令以宸濠之變先與

送其夫人避山中病前秘五日腹膨如鼓仰而張目
息已微急召孫孫曰此盛暑急驅飲水過度羞溺而
轉脬也法以猪尿脬吹氣貫滿令女婢投入衝之而
溺淋淋下遂起

江西通志

孫文垣治一富家婦大小便秘者三日市師以巴豆丸
二帖大便秘而小便愈秘脹悶臍突二寸餘前陰脹
裂不能坐卧啼泣呻吟欲求自盡孫曰此轉脬病也
柏樹東行根皮一寸滑石三錢元胡索桃仁當歸瞿

麥各一錢臨服入韭菜汁半杯服後食頃小便稍行
玉戶痛甚非極用力努之則不能出改用升麻桔梗
枳殼元胡索煎成調元明粉二錢乃提清降濁之意
服後大小便俱行始不脹急次日報云每便時腹先
痛有淡血水小便短再以丹參丹皮當歸白芍甘草
青皮香附元胡茯苓山梔山查兩帖而安

孫君又有四卷七十七頁一案亦轉將病治法大
抵如前唯多令患者橫卧界有力婦人以患者兩

脚膝彎架肩上將下體虛空提起搖擺數四則尿
脬倒上徐徐放下患者去衣不及小便箭射而出
熱如湯黑如墨頃刻盈盆一段

按轉脬病古人但令患者橫卧榻上

高其下體良久其尿自通殊不費力

黃履素曰予牕友賀立菴方伯常言其伯父賀岳精於
醫曾治一孕婦將坐草患小便不通百藥不效愈飲
愈飽束手待斃賀君診之曰此乃脾氣虛弱不能勝
胞故胞下墜壓塞膀胱以致水道不通大健其脾則

胞舉而小便自通以白朮二兩土炒加炒砂仁數錢
別加一二輔佐之藥服一劑小便立通其神如此予
常記此言于懷中壬寅歲內人有妊臨月竟同此病
藥無功危甚余以此法告醫者喜醫虛心如法治之
立效遂舉長子寅錫余若不聞此言母子均殆矣

李時珍嘗治數人小便不通及轉脬危急者令將蔥管
吹鹽入莖內極有捷效又小兒不尿乃胎熱也用大
蔥白切四片乳汁半盞同煎片時分作四服即通不

飲乳者服之即飲乳若臍四旁有青黑色及口撮者

不可救也

本草綱目

薛立齋治司徒李杏岡仲子室孕五月小便不利諸藥不應薛曰非八味丸不能救不信別用分利之藥肚腹腫脹以致不起

儒者王文遠室患小便不通小腹腫脹幾至於殆用八味丸一服小便滴瀝再以前丸之料加車前子一劑即利肚腹頓寬而安

陸養愚治方思桂女年十四患大小便不通已三日村
醫與丸藥數十粒如芝麻大服之大便立通而瀉小
便仍秘又二日脹悶臍突小腹時時抽痛不能坐卧
啼泣呻吟欲求自盡脈之沉數而兩尺尤甚曰此轉
臍病也時尚炎熱以六一散井水調服之小便稍行
行時陰中極痛後仍點滴不暢大便努責而無積腹
痛時作痛則如刀刺再診脈仍沉數乃用升麻三錢
柴葛甘桔各一錢以提清降濁服後二便俱行小便

純血大便亦帶血水其家猶危之曰今無患矣向者
丸藥必巴豆也病本熱鬱而以極熱之藥攻之向之
刺痛今之溺血皆巴毒使然也以犀角地黄湯加黃
連山卮數劑而愈

萬密齋治一娠婦淋瀝小便不通醫作轉胞治之不愈
乃用楸榔赤芍二味研末順取長流水煎湯調服效
此方治男婦一切血淋及淋澁水道疼痛用之無不
神驗

馬元儀治沈氏妾妊娠八月下利二十餘日利後患小便淋閉渴而引飲飲畢方去滴許澁痛異常已三晝夜診得肺脈獨大餘脈虛濇曰下利經久脾陰必耗燥火自強今見肺脈獨大是火據肺位金被火制氣化不及州都便溺何由而出經曰病在下者治上令上竅越則下竅自行矣且妊娠之體脈見虛澁氣血不能養胎可知若再行趨下不惟病不除且有胎動之患因與紫苑五錢耑達肺氣下及膀胱乾葛一錢

升發胃氣敷布津液火鬱則氣燥以杏仁蘇子潤之
燥勝則風生以薄荷清之加枳殼桔梗開提三焦之
氣一劑小便如泉再劑利下亦止

吳橋治趙氏婦故孱弱有身七月病不得大小溲醫者
遞以四苓利之卒不利久則小腹前後脹急痛楚燥
亂昏憤殆將不勝橋診之則以補中益氣湯加黃連
為劑一服小溲稍行明日為湯液五斗呼挈壺者口
授之扶病者坐臨盤遞引湯沃病者腹沃已口授座

姬舉手奉其胎大小溲即行病愈矣病得之食砒而
唾未盡其遺毒觸胎病者故內虛胎氣下墮而壓脬
矣或曰胎壓脬矣或曰胎壓脬而不得小溲誠是也
大溲何為橋曰小溲塞則鼓膀胱是將壅大腸其氣
亦為不利故爾聞者曰善

太函集

妊娠

胎墮

薛立齋治一婦人墮胎昏憤不時吐痰自用養血化痰
之劑昏憤不省自汗發搐痰涎涌出彼以為中風欲

用祛風化痰之劑薛曰此屬脾氣虛寒所致遂用十全大補湯加炮薑二十餘劑尋愈

一婦人年二十餘疫疾墮胎時咳服清肺解表喘急不寐薛謂脾土虛不能生肺金藥損益甚先與補中益氣加茯苓半夏五味炮薑四劑漸愈又與八珍加五味及十全大補湯全愈

龔子才治一婦人每懷孕至三箇月必墮不肯服藥教以四五老母雞煮湯入紅穀小黃米煮粥食之不數

服而胎固至足月生男

方節菴之夫人朱屢受產難因就醫乞墮胎方服之無效復求方於端產醫鄭氏鄭云墮胎不下必貴兒也今後宜服安胎藥矣一日方閒步阡陌間見一道人手攜竹筐坐於橋下與之語道氣盎然因設齋留之到家問筐中何物曰此濟瘵病人丹藥也因授一方名曰回生救產丹并勸修合普施朱夫人誕彌厥月時服一丸則果如達矣遂連生二子長名鵬字矯亭次

名鳳字改亭後一為宮詹一為御史云

張氏
卮言

薛立齋治一婦苦於生育孕及三月以麵粉燒酒調服
墮胎胎去下血不止嘔吐湯藥不納六脈細小欲絕
作毒藥傷胃氣胃氣虛不能司納以人參二錢甘草
五分水煎徐徐與服嘔止用八珍湯調理而安

又治一孕婦用前藥患前症胸腹飽滿嘔吐不止用萊
豆甘草湯飲之而安

一婦懷孕三月而墮墮後發熱自汗四肢軟弱曰氣血

虛不能營養其胎故墮墮後益虛陰虛則發熱陽虛則自汗以十全大補湯去桂加五味子而安

吳橋治程應兆妻故多病三月不月已忽微行諸醫以爲積血而力導之惡乃大至舉身汗溢垂絕而甦則又爲虛極而重劑補之上視反張驚搐昏冒飾巾待盡橋診之脈雖離經按之不絕曰此妊脈也誤謂積血迫之大行胎離經而欲下則血竭而途窮陽氣無陰血可依則浮騰而上越胎隨陽上逆而觸心故上

視反張驚搐昏瞶法不當死乃予順胎散始進甚艱
既及半而藥力行嗒焉而寐諸醫目橋曰死矣橋曰
藥中病乃寐諸公待之頃之呻吟始云頭痛諸醫以
為餘燼也夜分乃終橋曰中夜陽生此當來復時至
而圉圉乃少舒詰朝爽然俄仆卧內諸醫目攝橋曰
真死矣橋曰胎欲下而血垂盡壅闕不得行尋以順
胎散下之則血塊大如拱諸醫攝橋曰吾向固以為
積血果然橋徐應曰非積血也胎也立引水漱而濯

之外紫而中白具人形病者漸安諸醫乃服

太函集

妊娠胎死

許裕卿治邵涵貞內子孕十七月不產不敢執意憑脈問諸情況果孕非病但云孕五月以後不動心竊訝之為主丹參一味今日服七錢兩旬餘胎下已死而枯其胎之死料在五月不動時經十三月在腹不腐而枯如果實在樹敗者必腐亦有不腐者則枯胎之理可推也

張路王治馬雲生婦孕十三月不產脈來微結為處十全大補湯服至二十餘劑而下胎枯色白治雖異而胎枯則一也

喻嘉言治顧季掖乃室仲夏時孕已五月偶爾下血醫以人參阿膠勉強固其胎又經一月身腫氣脹血逆上奔結聚於咽喉胸膈間食飲纔入觸之痛楚轉下甚艱稍急即嘔出全似噎症數更醫咸謂胎氣上逼延至秋計孕已八月病已極呼吸將絕診之脈與病反

其脈尺部微瀋難推獨肺部洪大無倫其喘聲如曳
鋸其手臂青紫腫亮如毆傷色乃駭曰似此凶症何
不早商然不必明言以滋驚恐姑以善藥投之通其
下閉上壅可也必求病名曰上壅者以肺脈之洪大
合於會厭之結塞知其肺當生癰也下閉者以尺脈
之微瀋合於肉色之青腫知其胎已久壞也善藥者
瀉白散加苓桔之苦以開之不用硝黃等厲藥也服
一大劑腹即努痛如欲產狀問欲產乎曰肺氣開而

不行多時閉拒惡穢得出可也。奚產之云再進一劑
身腫稍退上氣稍平下白汚如膿者數斗裏朽胎而
出旬餘尚出白汚並無點血相間可知胎朽腹中已
近百日蔭胎之血和胎俱化為膿也。病人當時胸膈
即開連連進粥神思清爽然朽胎雖去而穢氣充斥
周身為青腫者未去也。胸膈雖寬而肺氣壅遏為寒
熱咳嗽者未除也。乃一以清肺為主旬餘獲痊。然則肺癰
未成乃穢濁之
氣上攻而然耳

立齋治一穩婆之女勤苦負重妊娠腹中陰冷重墜口

中甚穢意其胎必死令視其舌果青黑與朴硝半兩

許服之隨下穢水而愈

濟陰綱目
是薛案

一婦胎死服朴硝而下穢水肢體倦怠氣息淹淹用四

君子為主佐以四物薑桂調補而愈

同上

李將軍妻病甚呼華佗視脈曰傷娠而胎不去將軍言

間實傷娠胎已去矣佗曰按脈胎未去也將軍以為

不然佗舍去婦稍小差百餘日復動更呼佗佗曰此

脈固自有胎前當生兩兒一兒先出血出甚多後兒
不及生母不自覺旁人亦不悟不復迎遂不得生胎
死血脈不復歸必燥著母脊故使多脊痛今當與湯
并針一處此死胎必出湯針既加痛急如欲生者佗
曰此死胎久枯不能自出宜使人探之果得一死男
手足完具黑長可尺許佗之絕技凡此類也

三國志

陳斗巖治一婦孕四月而墮墮後腹腫發熱氣喘脈洪
盛面赤口鼻舌青黑陳曰脈洪盛者胎未墮也面赤

者心火盛而且乾也口鼻舌青黑肝氣絕而胎死也
以蛇脫煎湯調平胃散加芒硝歸尾服之下死胎而
安

華佗甘陵相夫人有妊六月腹痛不安華佗視脈曰胎
已死矣使下之果下男形即愈

三國志

陳良甫治僂宅厥媳孺人杜氏生產不下家人百方救
療皆無效召診之曰產前脈不可考但當察色而知
之遂揭帳明燭以察之其面色赤舌色青見此色者

知胎已死母却無憂矣或問曰何以知之答曰面赤舌青者子死母活明矣躬自合至寶丹二粒服之胎即落矣此以見古人處方神速

良方

妊娠異胎

莊氏婦懷妊三年不產有醫者診之曰脈象頗異疑必異物當以藥下之服畢覺腹中奇痛產一胞墮地而裂中有小蛇蜿蜒盤屈以次而出急撲之沉布衣麟

親見其事

三岡識畧

張路玉治一婦懷孕六月因喪子悲哭動胎醫用黃芩
白朮等二服不應改用香附紫蘇枳殼砂仁一服胎
遂上逼心下脹悶喘急口鼻出血第三日薄暮往診
其脈急疾如狂風驟雨十餘至則不至頃之復至如
前因喻之曰此孕本非好胎安之無益不若去之以
存母命因思此胎必感震氣所結震屬木惟金可制
今以鍊斧燒紅醋淬乘熱調芒硝一兩灌之夜半果
下異胎下後脈息微和神思恍惚所去惡露甚多又

與安神調血之劑數服而安

孫文垣治張氏婦年二十一診之左寸關短弱尺滑右

寸亦滑關濡弱尺沉微診畢其夫問曰脈何如

不告病原

曰心神脾志皆大不足

國圖得妙

肺經有痰

孫君平生多以一痰揣病

因躊躇不決久之曰左寸短弱如此安得有孕云已

七十日矣問曾經孕育否曰已二次今乃三也問二

產皆足月否男耶女耶曰始產僅九月手足面目俱

全第無啼聲抱起已身冷矣細檢之乃知其無水火

也

水火前
後陰也

次亦九月而產亦無啼聲驗之口中無舌

二胎之異如此乃為制方以補心脾為主令多服以

百帖為率棗仁茯神遠志各一錢白朮二錢白當歸

枸杞各一錢五分甘草五分生地八分艾絮二分龍

眼肉五箇水煎服足月產一子次年又有身不以前

事為意至九月產下形體具備外有脂膜一片包其

面不能去即殞因思上年所產獲全藥之力也乃以

前方黏壁間纔覺有身即照方服之後生子女皆無

恙

凡小兒有不足之症皆緣父母有虛損處觀此當舉一三反

郭茂恂嫂金華君產七日不食始言頭痛頭痛已又作心痛既而目睛痛如割如刺更作更止相去無瞬息間每頭痛欲取大石壓良久漸定心痛作則以十指抓壁血流滿掌痛定目又痛又以兩手自剜取之如是十日不已衆醫無計進黑龍丹半粒疾少間中夜再服乃瞑目寢如平時至清晨下一行約三升許如蝗蟲子三疾減半已刻又行如前則頓愈矣

濟陰綱目

河南開封府有丹容之婦懷娠甚巨動躍間似雙胎也
丹容語婦曰若生二男當名虎四兒虎五兒一日欲
出而天若雨狀謂妻曰晴履可耶抑雨具去可耶妻
未答則腹中朗應無雨丹容驚懼曰汝何人則曰虎
四兒也言未竟又聞聲曰雖不落也有幾點丹容曰
汝所為竟煉不成必須爐如何置火如何候藥如何
辨又曰如何如何乃毛也如何如何小點化如何如
何大點化待吾母為之可也丹容遂如言行之火然

疏黃偶客至門室既不深廣而客又不行其父與二
兒俱曰黃氣迫人奈何奈何至夜熏蒸蒸死世今有小
點化之術謂其傳也予則以為豈非天怒其泄故欲
滅其口耶然亦不知何妖也

錢國賓云山西大同軍人朱劉祿娶妻孔氏七年始孕
其腹極大月不能行八月不能動仰卧于牀延診右
寸及兩尺脈主別部一倍經斷當生雙女其懷胎之
狀主難產令服易產湯劑以救其母至十月期足腹

痛產下一女其腹不減至三日腹陣痛再產一女其腹仍大咸謂怪異必傷其母矣次日腹又陣痛又產一女腹始如故初生二女存三生之女斃

鬼胎

滑伯仁治仁孝廟廟祝楊天成一女薄暮遊廟廡見黃衣神覺心動是夕夢與之交腹漸大而若孕邀伯仁治診之曰此鬼胎也其母道其由與破血墜胎之藥下如蝌蚪魚目者二升許遂安

薛立齋治一婦人經閉八月肚腹漸大面色或青或黃
用胎症之藥不應診之曰面青脈濇寒熱往來肝經
血病也面黃腹大少食體倦脾經血病也此鬱傷脾
肝之症非胎也不信仍用治胎散之類不驗薛用加
味歸脾逍遙二藥各二十餘劑諸症稍愈彼欲速效
別服通經丸一服下血昏憤自汗惡寒手足俱冷嘔
吐不食薛用人參炮薑二劑漸愈又用十全大補湯
五十餘劑而安

此案依婦人良方鬼胎門選入

東白馬氏婦有妊歷十四月不產形瘠廋且黑松陽周
漢卿脈之曰非孕也乃為妖之所乘耳以藥下一物
如金魚疾旋已

立齋治一婦人虛羸有鬼胎癥塊經候不通診之曰此
病也非胎也令服四物湯加芫花根而塊漸消又令
用吳萸川芎柴秦蠶已戟已豆不去油芫花醋製
為末煉蜜丸梧子大每服七丸蜜酒下即出惡物而
愈後以八珍湯調理而安

錢國賓云余之太倉有長年吳山其妻懷孕十有八月
胎形漸大山以貧人難治日懷生死之憂求便道一
診其脈浮沉長短去來至止上下不一知痰非胎矣
曾見痰火端門書中一款凡婦人當經受驚其痰由
心胞絡流入血海如懷胎狀經閉漸大活動身安此
假胎也以清痰活血輕劑用芎歸地芍貝母天冬半
夏香附白芥子茯苓陳皮枳殼各一錢煎服數月乃
愈

六和埜農夫朱言之妻生平無病為人言寡凡有氣惱
不發肝火久鬱可知矣於天啓二年經後胎漸大起
居飲食如常至十月不生又十月不生家人憂甚醫
皆莫知其故錢亦曾診見六部浮鼓亦未敢斷又過
五月終日撒屁如此兩月胎消因當經著氣傷肝久
鬱沖於血海似懷胎而無形此名氣胎表出以識

續名醫類案卷三十二

欽定四庫全書

續名醫類案卷三十三

錢塘魏之琇撰

妊娠傷寒

繆仲淳治于潤父夫人妊九月患傷寒陽明症頭疼壯熱渴甚舌上黑胎有刺勢甚危繆投竹葉石膏湯索

白藥子

醫馬病者

不得即以井底泥塗臍上乾則易之一

日夜盡石膏十五兩五錢病瘳產一女母子毋恙

治妊娠傷寒護胎為要否則胎墮多死以白藥子
為細末雞子清調攤綿紙上如椀大自臍帖至臍
下胎存生處乾即以濕水潤之臨症者慎勿忘此
妊娠感寒

馮楚瞻治一孕婦勞役受寒忽四肢厥冷喘急大作額
汗如雨六脈沉細欲絕令以人參五錢桂附共三錢
煎服病家曰已孕三四月服桂附保勿墮乎曰此時
重母不重子未有母亡而子活者服下少頃吐出清

水藥入腸胃其聲汨汨直達而下作噯數聲喘減汗收脈漸起乃平和調理以漸而安十月足生一子

張路玉治一婦人素稟氣虛多痰懷妊三月因觸月舉喪受寒遂惡寒不嘔逆清血

血字疑水字之誤

腹痛下墜脈

得弦細如絲按之欲絕與生料乾薑人參半夏九二服不應更與附子理中加苓半肉桂調理而康大抵懷孕母氣多火苓連則安多寒得桂附則安多痰得苓半則安務在調其偏勝適其寒溫未有母氣逆而

胎得安亦未有母氣安而胎反墮者

較馮說自然

所以金

匱有懷妊六七月胎脹腹痛惡寒小腹如扇用附子湯溫其臟者然認症不果不得妄行是法一有差誤禍不旋踵非比苓連之誤猶可引延時日也

妊娠傷暑

孫文垣治竹匠婦孕五月患心痛究所由為失足墮樓也教飲韭菜汁一盞痛隨止又服他醫藥二帖心復痛吐鮮血盈盆胸間沖沖上抵痛不可言危在頃刻

再診六脈皆洪大汗出如雨喘息不相續亟令移居樓下與益元散五錢用紫蘇湯調服戒之曰今夜若睡聽其自醒切勿驚動汗止即甦也服後果睡至曉汗斂胸膈不痛喘息亦定再與固胎飲一帖全安先是隣醫診之謂吐血脈宜沉細今反洪大又汗出喘息不休危在今夜見病起來詢曰孕婦不得汗下及利小便謂之三禁昨劑悉犯之而反獲效何也曰醫貴審症蓋婦之汗非由病以樓居低小當暑酷熱逼

故也汗血去而胎失養故上抵喘息不續移樓下避暑氣益元散為解暑聖藥紫蘇又為安胎妙品氣下則血歸元而病痊矣法出醫壘元戎中四血飲是也乃唯唯而退

妊娠喘逆

張子和治吳產祥之妻臨月病喘以涼膈散二兩四物湯二兩朴硝一兩作二服煎令冷服一服病減大半次又服之病痊效矣張曰孕婦有病當十月九月內

朴硝無碍八月者忌之七月却無妨十月者已成形
矣

周仁齋治一孕婦痰喘用生半夏錢半肉桂乾薑各五
分五味子三分麻黃二分先以水煎後下藥勿令太

熟熱服其喘即止

半夏肉桂皆孕婦所忌
宜酌用之切勿輕率

薛立齋治吳江人史萬湖仲子室年二十餘疫疾墮胎
時咳服清肺解表之藥喘急不寐此脾土虛而不能
生肺金也藥復損而益甚也先與補中益氣加茯苓

半夏五味炮薑四劑漸愈後往視之用八珍湯加五味十全大補湯而愈

妊娠咳嗽

薛立齋治一妊婦嗽則小便自出此肺氣不足腎氣虧損不能司攝用補中益氣湯以培土金六味丸加五味以生腎氣而愈

一妊婦咳嗽其痰上涌日五六碗許諸藥不應此水泛為痰用六味丸料及四君子湯各一劑稍愈數劑而

安

一娠婦因怒咳嗽吐痰兩脇作痛此肝火傷肺金以小
柴胡湯加山梔枳殼白朮茯苓治之而愈但欲作嘔
此肝侮脾也用六君子湯加柴胡升麻而愈

妊娠 煩熱

薛立齋治一妊婦煩熱吐痰惡熱惡心頭暈此脾虛風
痰為患用半夏白朮天麻湯以補元氣祛風邪漸愈
惟頭昏未痊乃用補中益氣湯加蔓荊子以升補陽

氣而愈

一妊婦煩熱兼咽間作痛用知母散

知母麥冬黃芪
子苓赤苓甘草加

山梔竹瀝以清肺金而愈後內熱咳嗽小便自遺用
補中益氣加麥冬山梔以補肺氣滋腎水而痊

妊娠嘔吐

薛立齋治一妊婦停食腹滿嘔吐吞酸作瀉不食以為
飲食停滯兼肝木傷脾土用六君子湯以健脾胃加
蒼朮厚朴以消飲食吳茱萸所製黃連以清肝火諸

症悉愈又以六君加砂仁調理而脾土乃安

一妊婦嘔吐脇脹或寒熱往來面色青黃此木旺而尅脾土用六君子加柴胡桔梗枳殼而安

一妊婦胸脇脹痛吐痰不食此脾胃虛而飲食為痰用半夏茯苓湯漸愈又用六君子加枳殼蘇梗桔梗而飲食如常後因恚怒脇脹不食吐痰惡心用半夏

茯苓湯加柴胡山梔而愈

立齋治妊婦亦時用半夏

一妊婦因怒寒熱胸脇脹痛嘔吐不食狀如傷寒此怒

動肝火脾氣受傷也用六君子加柴胡山梔枳殼丹皮而愈但內熱口乾用四君子加芎歸升麻而安

一妊婦霍亂已止但不進飲食口內味酸泛行消導寬中薛曰此胃氣傷而虛熱也當服四君子湯彼不信乃服人參養榮湯嘔吐酸水其胎不安是藥復傷也仍與四君子湯俾煎熟令患者嚥藥氣不作嘔則呷少許恐復嘔則胎為鈎動也如是旬餘而愈

妊娠瀉

陳三農治一婦有孕常作瀉久瀉屬腎用白朮四兩煮熟山藥二兩炒甘草一兩炙杜仲薑汁炒松花炒各七錢米糊為丸服愈

薛立齋治邊太常側室妊娠泄瀉自用枳朮黃連之類腹悶吐痰發熱惡寒飲食到口即欲作嘔強匙許即吐酸不快欲用祛痰理氣此因脾胃傷而痰滯中脘若治痰氣復傷脾胃矣遂以參朮炮薑為末丸如黍粒不時含嚥三五丸漸加至三百後日進六君子湯

尋愈

進士王繳徵之內懷妊泄瀉惡食作嘔此脾氣傷也其君憂之強進米飲薛曰飲亦能傷胃且不必強別用人參養胃湯飲之吐水酸苦又欲投降火寒藥曰若然則胃氣益傷也經云損其脾胃者調其飲食適其寒溫後不藥果愈

一婦人因怒胸膈不利飲食少思服消導順氣之劑脾胃愈弱飲食愈少大便不實且無度久而便黃水或

帶白視其面色黃中隱白曰黃色脾虛也白氣肺虛也朝以補中益氣湯升補胃氣夕以六君子湯培補脾氣而愈

妊娠遺尿

薛立齋治一妊婦遺尿內熱肝脈洪數按之微弱或兩太陽作痛脇肋作脹此肝火血虛用加味逍遙散六味地黃丸尋愈後又寒熱或發熱或恚怒前症仍作用八珍散逍遙散兼服以清肝火養肝血而痊

妊娠 秘結

張子和治一婦人病大便燥結小便淋瀝半生不孕常服疎導之藥則大便通利暫止則結滯忽得孕至四月間醫者禁疎導之藥大便仍難臨圓則力努為之胎墮凡如此胎墮者三又孕已經三四月前後結瀉甘分胎墮張診之兩手脈雖滑不敢陡攻遂以食療之用花減煮菠薐菜以車前苗作茹雜猪羊肉血作羹食之半載居然生子燥病亦愈屢見孕婦利膿

血下迫極努損胎但同前法治之愈者莫知其數

薛立齋治李蒲汀側室妊娠大小便不利或降火理氣之劑元氣反虛肝脈弦急脾脈遲滯視其面色青黃不澤薛曰此鬱怒所致也用加味歸脾湯為主佐以加味逍遙散而安

主政王天成之內妊娠痢病愈後二便不通其家世醫自用清熱之劑未效診其脈浮大而濇此氣血虛朝用八珍湯加桃仁杏仁夕用加味逍遙散加車前子

而瘥

陸養愚治一婦孕九月大小便不通已三日忽胎上衝
心昏暈數次診之脈沈洪而實謂當下之與其大承
氣湯一劑少加木香豆仁村醫見用大黃兩許搖頭
伸舌其良人有難色乃謂之曰余坐汝家待其得生
始去始安心煎服一二時許二便俱行去黑矢極多
胎亦無恙乃留調氣養榮湯二劑而不服數日後小
水不利乃煎服之而愈月餘產一男

陳三農治一婦妊娠五月大小便不通胸腹痞滿腿足
及心腹刺痛難忍用芎歸赤芍枳殼枳椇木通滑石
杏仁葱白童便水各一鍾煎八分入大黃末二錢車
前子末二錢再沸入蜜四五匙溫服大小便皆利而
安

聶久吾曰一醫來問云我治一婦孕八九月忽然大小
便不通腹脹甚用承氣湯下之仍不通今危矣予曰
此非煎藥所能下教用牽牛大黃九下之服至一兩

許而大小便俱通次日其夫來謝因云諸病皆除唯
小便時要人將手緊按小腹方可便否則不能便因
思此是氣尚閉與青皮香附等行氣藥一劑而愈逾

月生男母子無恙

方見
嘔門

妊娠

瘧疾

薛立齋治一妊婦瘧久不已噯氣下氣胸腹膨脹食少
欲嘔便血少寐此屬肝脾鬱怒用歸脾湯加柴胡山
梔漸愈又用六君子湯加柴胡山梔升麻而愈

一妊婦患瘧已愈但寒熱少食頭痛晡熱內熱此脾虛
血弱用補中益氣湯加蔓荊子頭痛頓止又用六君
子湯加芎歸飲食頓進再用逍遙散加白朮而寒熱
愈

陳良甫治一妊婦六七箇月而瘧疾先寒後熱六脈浮
緊衆醫用柴胡桂枝無效陳言此疾非常山不愈衆
醫不肯因循數日病甚無計勉強聽之遂用七寶散

一服愈

良方

薛立齋治一妊婦三月飲食後因怒患瘧連吐三次用藿香正氣散二劑遂用安胎飲一劑而愈後因怒痰甚狂言發熱胸脹手按少得此肝脾氣滯用加味逍遙散加川芎二劑頓退四劑而安

薛仲芳治一孕婦瘧疾大作脈得弦數用知母四錢柴胡三錢陳皮二錢甘草一錢井河水各一碗煎至一碗露一夜明早隔湯頓服而愈不愈加生首烏五錢自盜汗甚加黑豆三錢食多加枳殼二錢此方熱多

者宜之

一孕婦瘧疾右脈微滑左脈微弦曰脾虛生痰也以白
朮五錢生薑三錢井河水煎露一夜溫服而愈此方
寒多者宜之

妊娠

下利

薛立齋治地官胡成甫之內妊娠久痢自用消導理氣
之劑腹內重墜胎氣不安又用阿膠艾葉之類不應
薛曰腹重墜下元虛也胎動不安內熱甚也遂用補

中益氣而安又用六君子湯全愈

盛用敬治陳傑妻有胎而患痢數月昏厥六日矣所下若屋漏水棺斂已具盛診之曰無慮藥之痢止而胎

動越數日生一子

吳縣志

孫文垣表姪女孕已七月患赤痢腹痛後重體素弱以白芍三錢條芩一錢五分白朮地榆各八分甘草三分二帖而愈後因稍勞痢復作以當歸三錢川芎一錢五分真阿膠二錢艾葉三分一帖全愈

此非積滯為痢故治

此法如

朱丹溪治八燔將產患痢脈細弦而稍數後重裏急用
滑石三錢白芍二錢枳殼炒一錢五分木通二錢甘
草五分白朮二錢茯苓一錢桃仁九枚研同煎

馬元儀治張氏婦孕八月患痢晝夜四五十行腹痛胎
氣攻逆不思飲食診之兩關尺沉細下半微冷曰遽
症亦濕熱成痢但脈沉則為寒微細則為虛又下半
微冷乃火衰于下土困于中平時乏敷布之道則水

穀之氣順趨而下津液血脈不充胎元失養而攻逆
為便膿脈沉腹痛脈微均屬危險當舍症從脈可以
母子保全用人參一兩合附子理中湯二劑脈安和
四劑症平調理而愈

友人虞元靜房中人方孕五月患滯下腹痛日不下數
次為定此方甫服一鍾覺行至復即解一次痛亦隨
已滯亦全愈川黃連四錢白芍黃芩枳殼各三錢蓮
肉四十粒橘紅乾葛各錢半扁豆紅麴各二錢升麻

五分炙草一錢烏梅肉一箇

廣筆記

孕婦痢

汪陞堂隣居也其室人病痢已久未嘗藥初下紅白後單下紅每甚于夜腹痛後重渠岳翁乃儒而醫與歸脾合補中益氣持方問余余曰此古人成法也第慮服之轉劇耳不信服二劑果下益頻乃延診脈沉弦且駛與棗仁山藥杞子地黃當歸白芍甘草黃芩六劑全愈因問曰君向謂歸脾補中服之必增劇已而

果然此何故余曰久痢亡陰芪朮升柴令陽愈升則陰必愈降理所必然又問腹尚痛而後重未除乃不用香砂此又何說余曰用香砂亦無大害第不能速愈

唐赤城內人年二十餘孕數月喜瓜果夏間常痛下痢以為胎氣冬盡已分娩而痛痢不減一老醫謂產後虛寒且久痢與白朮炮薑建蓮扁豆香附砂仁木香遠志諸溫燥健脾痢轉甚又加補骨脂肉豆蔻痢益

頻每粥食纔下咽糞穢即下出不及至圍視之乃完穀不化僉謂腸胃已直瀉若竹筒病必不起將治木診之脈細數而瀉顴頰嬌紅舌胎燥黑曰此痢疾也第服藥二劑必見紅白因告以向醫謂為虛寒將敗之症今以為痢再下紅白寧望生乎曰病緣過傷生冷滯于迴腸久從熱化產後腹空其積將下乃為燥熱所劫致積反留而真陰愈傷內熱益熾今之頻併急速乃協熱下痢之痢非虛寒下脫之痢也試觀其

面紅陰虛可知舌黑內熱可知但先助其陰則其下必緩而積滯見矣與熟地杞子各一兩棗仁五錢服下面紅頓減舌黑漸退食入遂不下迫再服則裏急後重紅白兼行仍與前方入苓連歸芍甘草出入加減十餘劑已愈八九矣以歲除停藥新正邀診已飲食如常起居復故唯便後微有淡血水此脾絡受傷之餘症也前方去苓連加烏梅二劑可愈乃云舍親謂先生用補藥太早致成休息痢蓋前醫是其至戚

特令其邀予一次以相嘲耳予因謂曰與其為直腸
瀉毋寧為休息痢乎一笑而別

凌表姪婦素怯弱孕數月幾成損症以重劑滋養而愈
已十月因時感發瘡瘡科投荊防枳桔等二劑其師
黃澹翁力止之乃但服頭煎已而乾咳咽痛面赤口
燥夜熱盜汗因食生梨數片遂泄瀉如痢腹痛後重
日夜十餘行或曰立齋云梨者痢也凡病後及孕產
皆不可食今腹痛下痢非傷生冷而何診之脈洪數

左寸鼓指曰錢仲陽謂診子無他症者但用平藥令
病人陰虛多火滋養猶恐不及乃用香竈以鼓之致
三陰之火乘虛上衝肺肺既熱甚勢必下迫大腸而
為痢子梨何與蓋立齋之言言其常耳合脈與症猶
當以涼潤取效也詢其小便熱短而口苦用生地杞
子沙參麥冬川連萸仁元參牛旁二劑痢止後重除
忽肛門腫痛謂欲作痔曰非也此肺火下傳病將愈
耳去黃連加黃芩數劑諸症全愈

妊娠 瘧痢

趙養葵治一孕婦瘧痢齊發他醫治兩月餘瘧止而痢愈甚又加腹痛飲食少進趙診之曰虛寒也以補中益氣加薑桂一服痢止大半再一服而反加瘧疾大作主人驚恐趙曰此吉兆也向者瘧之止乃陰甚之極陽不敢與之爭令服補陽之劑陽氣有權敢與陰戰再能助陽之力陰自退聽方中加附子五分瘧痢齊愈大進補劑越三月產一子產後甚健

張路玉治太學夫人懷孕七月先瘧後痢而多鮮血與
補中益氣湯加吳茱萸製川連而愈每見孕婦病瘧
胎損而致不救者多矣

郝氏婦懷孕九月患瘧三四發後即嘔惡畏食診其脈
氣口濇數不調右關尺弦數微滑此中脘有冷物阻
滯之候以小柴去黃芩加炮薑山查四服稍安思食
但性不嗜粥連食鷄鴨之類遂瘧痢兼併胎氣下墜
不安以補中益氣去黃芪加木香烏梅五服而產產

後瘡痢俱不復作矣其僕婦產後數日亦忽下痢膿血至夜微發寒熱小腹脹痛與千金三物膠艾湯去榴皮加炮黑山查六服而瘳

萬密齋治典史熊鏡妻有孕先于五月病熱或治之變瘡更醫加痢至八月瘡痢並行脈左沉實有力右浮大而虛此男娠內傷病也用補中益氣湯加條芩焙白朮十餘劑瘡痢俱止後以胡連丸調理而安後生

一男

妊娠內傷

高鼓峯治吳餐霞室人妊娠患內傷腹脹不思飲食口渴下痢醫以消導寒涼與之病轉甚而胎不安高曰此得于飲食後服涼水所致耳

脈必沈而遲濡

投以大劑理中湯數劑乃全愈

一婦人患內傷症孕已八月身體壯熱口渴舌胎焦黑醫寒涼治之高曰無論內傷即麻黃桂枝症也須安胎後攻邪今兩手脈數大無倫虛熱盛極乃復用寒

涼陽受陰逼其能久乎投以滋腎生肝飲一劑熱退
繼用補中益氣湯而愈

薛立齋治一妊婦因停食服枳朮丸胸腹不利飲食益
少服消導寬中之劑其胎不墜此脾氣虛而不能承
載也用補中益氣及六君子湯中氣漸健其胎漸安
又用八珍湯加柴胡升麻調理而痊

一妊婦飲食停滯心腹脹痛或用人參養榮湯加青皮
山查枳殼其脹益甚其胎上攻惡心不食右關脈浮

大按之則弦此脾土不足肝木所侮用六君子加柴胡升麻而愈後小腹痞悶用補中益氣湯升舉脾氣乃痊

妊娠虛損

姚葭田室人年三十餘頗而肥白前二子皆殤後孕而胎墮今又惡阻甚逆脈之虛軟而大與杞子地黃沙參麥冬川連等漸向安又腰腹腿足時痛或加當歸白芍或加山藥棗仁熟地用至兩許或下墜則與補

中益氣一二劑以熟地山藥代參朮或時胸腹脹痛
稍用香砂橘木則中氣便覺沖陽良由久虛榮弱香
燥毫不相宜彼執方遇病者可與言治法乎哉後服
藥幾百帖足月生男

胡乾若室人年二十餘婚數年無生育因診翁便求診
曰孕也然三陰俱不足曰孕或未然今所患夜熱咳
嗽腹痛便溏左足不良于步詢其腹痛必內外牽引
腰亦必痛足之筋則短而不舒又下午則腫否曰皆

如所言然則三陰虛損無疑矣與杞地歸芍沙參麥冬等令服五十劑臨月再服二十劑乃無後患乃服十餘劑病已痊遂不藥後臨產暈厥產後復厥耑科以其寒熱往來則投柴胡桂枝腹痛便澹則與炮薑白朮致身發白癰細者如芝麻粗者如菴豆腹痛甚則偃卧以蒲團著腹左右旋轉稍可脈之弦急而數舌黑而燥此肝火乘三陰大傷為患也令以前方加熟地川連白芍甘草數劑而愈次年患痢醫以痢藥

愈之又明年腹痛便溼與前年初孕症同召前醫則
仍以為痢也恰與攻伐遂胎墮而殞又張氏姊妹三
人每胎皆腹痛泄痢產後乃止此雖胎氣亦由肝木
乘脾所致

妊娠 悲傷

薛立齋治一孕婦無故悲泣用大棗湯而愈後復患以
四君子加麥冬山梔而愈

陳良甫曰鄉先生鄭虎卿內人黃氏妊娠四五箇月遇

晝則慘憾悲傷淚下數次如有所憑醫與巫者兼治
皆無益良甫時年十四正在儒中習業見說此症而
虎卿皇皇無計良甫遂告之管先生伯同說先人曾
說此症名曰臍燥悲傷非大棗不愈虎卿借方看之
甚喜對症笑而治藥一投而愈矣

良方

妊娠 心腹痛

薛立齋治一妊婦心痛

非真心痛也

煩熱作渴用白朮散即

愈後因停食其痛仍作胸腹膨滿按之則痛此因飲

食停滯用人參養胃湯按之不痛乃脾胃受傷以六君子補之而愈

一妊婦心腹作痛胸脇作脹吞酸不食此肝脾氣滯用二陳山查山梔青皮木香而愈又因怒仍痛胎動不食面色青黃肝脈弦緊脾脈弦長此肝乘其土用六君子湯加升麻柴胡木香而愈

一妊婦心腹作痛胎氣上攻吐痰惡心飲食少進此脾虛氣滯而為痰用六君子加柴胡枳殼諸症漸退飲

食漸進又用四君子加枳殼山梔桔梗而安後因怒
兩脇氣脹中脘作痛惡寒嘔吐用六君子加柴胡升
麻一劑而愈

朱丹溪治孫院君因近喪冒惡氣傷胎肚痛手不可近
發熱口中不思食須安胎散遂用青皮三錢黃芩白
芍各二錢歸尾一錢五分木香五分甘草炙四分二
帖水三盞先煎芩根二大片至二盞去芩根入前藥
同煎至一盞熱服

吳洋治汪伯玉從叔母吳病小腹急痛面痒痒惡寒醫
路萬先至曰妊娠轉胞洋曰不然此陰症也叔曰若
病得之內誠如公言萬拂衣行厲聲曰吳生殺而婦
矣洋即為灸氣海一所進理中湯頃之疾平萬語塞

太函
集

喻嘉言治李思萱室人有孕冬月感寒至春而發因連
食雞子雞麵遂成夾食傷寒一月纔愈又傷食吐瀉
作前後七十日共反五次遂成隔症診時其脈上涌

而亂重按全無嘔噦連綿不絕聲細如蟲鳴久久方
大嘔一聲曰病人胃中全無水穀已翻空向外此不
可救之症也無已必多用人參但纔入胃中即從腸
出奈何李曰十兩之費尚可勉備喻曰足矣乃煎人
參湯調赤石脂末以墜安其翻出之胃氣乃少回少
頃不便人即脫去凡三日服過人參五兩赤石脂末
一斤俱從大腸瀉出得食仍嘔但不嘔藥耳因思必
以藥之渣滓如粳粥之類與服方可望其稍停胃中

頃之傳下又可望其少停腸中遂以人參陳皮二味
剪如芥子大和粟米同煎作粥與半盞不嘔良久又
與半盞如是再三日始得胃舍稍安但大腸之空尚
未填實復以赤石脂為丸每用人參湯兩許如是再
三日大便亦稀此三日參橘粥內已加入陳食米每
進一盞日十餘次人事遂大安矣仍用四君子湯調
理共用人參九兩全愈然此亦因其胎尚未墮有一
線生氣可續不然用參雖多安能回元氣于無何有

之鄉哉後生一子小甚緣母病百日失蔭故也

黃咫旭乃室病膈氣二十餘日飲粒全不入口診之尺脈已全不至矣詢其二便自病起至今從未一行止是痰沫上涌奄奄待盡或謂其脈已離根頃刻當壞喻曰不然脈經上部有脈下部無脈其人當吐不吐者死是吐則未必死也但得天氣下降則地道自通此症以氣高不返中無開闔因成危候宜緩法以治其中自然見效遂變古人治膈之法用其意不用其

方緣尺脈全無莫可驗其孕之有無若有而不求以赭
石乾薑輩傷之呼吸立斷矣姑闕疑以赤石脂易赭
石煨薑易乾薑用六君子湯加旋覆花煎調服下嘔
即稍定三日後漸漸不嘔又三日粥飲漸加但不大
便已月餘矣日以通利為囑曰臟氣久結飲食入胃
每日止能透下一二節積之既久自然通透蓋以歸
地潤腸恐治膈而作嘔

喻君子肝腎病
治法終身未曉

硝黃通腸恐

傷胎而殞命姑拂其請堅持三五日果氣下腸通月

餘腹中之孕漸著而病全瘳矣

施笠澤治吳玄水婦妊病嘔吐四十日不進糜飲二十七日不洩溺衆以為必死矣診其脈俱沉滑而數曰此疾因火搏凝結中脘陰陽失次氣包血聚是謂闕格靡有攸處治之則生不治則死吳曰雖九仙之木精石髓其如不內何曰姑試之乃用雞胫脰沉丁香海石等末之若塵用甘瀾水濃煎枇杷葉取湯調服始吐漸留旋進香砂湯一飲而洩通再飲而糜進然

喉中有物哽哽不能上下曰此病根也仍用前湯探吐吐出結痰如麥冬蓮實者三四枚其病遂瘳妊亦

無恙

筆仗精工可法

妊娠瘡

博陵醫之神者曰郝翁有妊娠瘡不能言郝曰兒大經

壅故不能言兒生經過自能言矣

葉杏林女科

蕭賡六曰內經大奇論以胞精不足善為死不言為生

此可驗九月而瘡非胞精不足故當十月而復也

同上

妊娠乳病

孫大垣治程玉吾內人妊已七月乳忽紅腫而痛灑淅惡寒發熱將成內吹以大瓜萹四錢為君當歸尾二錢為臣甘草節蒲公英貝母連翹各一錢二分為佐青皮柴胡各八分橘葉五片為使二劑而瘳此方治驗不可勝數婦女怒鬱肝經為多瓜萹甘草為緩肝之劑貝母開鬱連翹蒲公英解毒柴胡青皮調氣橘葉引經當歸活血活氣調毒解熱散而腫痛消釋

也若將成膿可加白芷

醫經綱目治婦人吹乳皂角散歌曰婦人吹乳治如何
皂角燒灰蛤粉和熱酒一杯調一字頃間揉散笑呵
呵

惡阻

龔子才治劉尚書妾有孕患惡阻嘔吐不止飲食不下
心中煩躁頭目眩暈咸以二陳湯藿香正氣散保生
湯之類遍投不效診之左脈微數氣口數此血虛氣

盛有火也若不養血則火不降火不降則嘔不止以茯苓補心湯加薑汁炒黃連竹茹二服全愈

盧不遠治史氏婦嘔吐之聲遠聞百步脈之左關鼓指不連於寸兩尺滑搏於左獨加水飲不入唇七日矣與透肝之劑斷其必孕男藥進而嘔定月足果產男是症初寒熱大作嘔吐不食人皆以為傷寒盧以尺中脈搏知其為妊其關不連寸者蓋肝鬱善怒而不善發也順其性而伸之調之肝舒氣平惡自無阻而

嘔自定耳

馮楚瞻治一婦妊娠三月而大吐兩月有餘藥食俱不能受六脈沈微已極竟依脈立方以人參五錢炙甘草一錢炮薑製附各一錢五分数劑而愈胎亦安然無恙

柴嶼青治翁氏家人沈泰女懷娠三月患惡阻醫以感冒治之方中用半夏二錢連投二劑腹痛異常身熱盜汗歷有二旬求診柴謂半夏乃孕婦所禁如何可

用二錢無怪乎腹痛之甚也其胎不墮幸矣遂與養陰之劑半月而瘥并令其八月後服達生散十餘劑至臨產生理甚順而速得舉一子

張玉路治錢氏婦去秋瘧久大虛飲食大減經水不調季冬畧行一度今春時發寒熱腹滿不食服寬脹利水藥不應擬進破血通經之劑張診之其脈左手厥厥動搖右關與兩尺雖微弦而重按久按却滑實流利惟右寸左關虛濡而數尋之濇濇少力此陰中伏

陽之象詢為胎脈無疑良由中氣虛乏不能轉運其胎故作脹耳前醫曰自結禱至今距十二載從未受孕病後元氣太虛安有懷孕之理張曰向之不孕必有其故今病後餘熱留於血室因而得孕亦恒有之理細推病機每粥食到口輒欲作嘔惟向晚寒熱之際得熱飲入胃其寒熱頓減豈非胃氣虛寒水精不能四布留為涎液汪洋心下乎俗名惡阻是也其腹滿便難之虛實尤當明辨金匱云趺陽脈微弦法當

腹滿不滿必便難乃虛寒從下上也當以溫藥服之
況大便之後每加脹急以裏氣下通濁陰乘之上擾
與得下暫時寬快迴殊其治雖當安胎為主但濁陰
之氣非藉辛溫不能開導其結遂疏六君子湯益入
歸芍以收營血之散稍借肉桂為濁陰之嚮導使母
氣得溫中健運之力胎息無濁陰侵犯之虞桂不傷
胎龐安常先有明試余嘗屢驗之矣服後寒熱漸止
腹脹漸寬飲食漸進胎息亦漸形著至仲夏因起居

不慎而胎漏下血前醫猶認石瘕欲進破積喻以左

寸動滑斷屬乾象與扶脾藥得安後產一子

此案手筆絕似

喻嘉言豈秀才文藝固應如是耶

陳三農治惡阻諸藥不納以蘇梗三錢砂仁一錢煎服
或烏藥為君沉香次之人參甘草又次之為細末以
薑切片粘藥末咬嚼咽津液極至丹田過一時又如
此嚼即愈

薛立齋治一妊婦停食腹滿嘔吐吞酸作瀉不食此飲

食停滯兼肝木傷脾土用六君子湯以健脾胃加蒼
朮厚朴以消飲食吳茱萸所製黃連以清肝火諸症
悉愈又以六君砂仁調理而脾土乃安

一孕婦嘔吐酸水胸滿不食此脾土虛為肝木所侮用
六君子加白芍而愈又用四君子加枳桔而安

萬密齋治徽商吳儼妻年三十餘少子二歲尚食乳經
水未行因反目激怒得嘔逆病食入隨吐凡所食物
鼻中即作其臭醫俱作反胃治不效其脈左三部沉

實搏手右三部平和曰此有孕也當生二男汪曰前
生三子皆三歲而後孕今兒方二歲經又未動宜非
孕也曰身自有孕且不知之況醫人乎宜其治之不
效蓋怒傷肝肝傳心諸臭皆屬于心心傳脾故隨所
時物即作其氣而出也嘔逆食臭皆肝心二臟之火
炎上也以黃芩一兩黃連白朮陳皮香附茯苓各五
錢炒砂仁二錢為末神麴糊丸棗豆大每服五十丸
白湯下未五日而安後生雙男

妊娠下血

薛立齋治一妊婦下血服涼血之藥下血益甚食少體倦此脾氣虛而不能攝血用補中益氣湯而愈後因怒而寒熱其血仍下此肝火旺而血沸騰用加味道遙散血止用補中益氣湯而安

一妊婦下血發熱作渴食少體倦屬脾氣虛而肝火所侮用四君子加柴胡山梔血止因怒復作用六君加柴胡山梔升麻而安

一妊婦六月每怒血下甚至寒熱頭痛脇脹腹疼作嘔

少食薛謂寒熱頭痛乃肝火上衝

此語無人解通

脇脹腹痛

乃肝氣不行作嘔少食乃肝侮脾胃小便下血乃肝火血熱用小柴胡加白芍炒山梔茯苓白朮而愈

一妊婦胎及六月形體倦怠飲食少食勞役下血胎動不安用六君加當歸熟地升麻柴胡而愈

張子和治一婦娠半年因傷損下血張診之以三和湯一名玉燭散承氣湯四物湯對停加朴硝煎之下數

行痛如手拈下血亦止此法可與智識高明者言膏
梁之家慎勿舉似非徒駭之抑又謗之嗚呼正道難
行正法難用古今皆然

孫丈坦治姪孫婦三孕而三小產六脈滑數乃氣虛血
熱也因血頻下甚恐怖終日偃卧稍起血即大下與
生地白芍白朮地榆桑寄生續斷甘草升麻椿根白
皮黃柏條芩服之血三日不來惟白帶綿綿下因起
身稍勞血復行謂血滑已久若不濇必不能止又血

海甚熱亦肝風所致防風子苓丸正與病對宜製與之又製白芍六兩側柏葉條芩各三兩防風椿根白皮各二兩蜜丸服之逆血止胎安足月產子此後絕無胎漏之患後遇此症第用此法皆驗

張路玉治鄭墨林夫人素有便紅症妊七月正肺氣養胎時患冬溫咳嗽咽痛如刺下血如崩脈較平時反覺小弱而數此因傷熱太陰血分也與黃連阿膠湯二劑血止後去黃連加萸萆桔梗人中黃四劑而安

柴嶼青治其妾母懷孕五月與女伴爭競致傷腹痛見紅穩婆驗云昨夜子已在產門定死腹中診其六脈如常驗其舌紅活斷以決無此理用安胎養血藥二劑而起至十月滿足產一子

葉杏林曰一婦人妊娠月信不斷而胎不損產科熊宗古曰婦人血盛氣衰其體必肥是以月信來而胎不損若作漏治則胎必墮若不作漏胎治則胎未必墮也

立齋治一妊婦尿血內熱作渴寒熱往來胸乳作脹飲食少思肝肺弦弱此肝經血虛而有熱也用加味道遙六味兼服漸愈又用八珍湯加柴梔丹皮而全愈矣

未選

妊娠下血

許竹溪室人妊娠七月偶以舉重跌磕遂胎動下血甚多與熟地一兩杞子五錢白芍三錢甘草五分棗仁三錢數劑全愈

胡田室人先嘗妊娠以胎漏諸治罔效延至二十四月而產近有孕仍漏血下因胃痛求治脈之兩關弦數與生地杞子沙參麥冬川揀胃痛愈而胎亦不漏矣

妊娠 癰瘕

薛立齋治一婦人素口苦月經不調或寒熱妊娠五月兩臂或拘急或緩縱此肝火血熱所致也用四物加柴胡山梔丹皮鉤藤治之而愈

一妊婦因怒寒熱頸項動掉四肢抽搐此肝火血虛風

熱用加味道遙加鈎藤數劑而痊

一妊婦頸項弦直腰背作痛此膀胱經風邪所致用拔
萃羌活湯一劑而愈又用獨活寄生湯及八珍湯以
祛邪固本而痊

一妊婦四肢不能伸服祛風燥血之劑遺尿痰甚四肢
抽搐此肝火血燥用八珍湯加炒黑黃苓為主佐以
鈎藤湯而安後因怒前症復作小便下血寒熱少寐
飲食少思用鈎藤散加山梔柴胡而血止用加味道

遙散寒熱退而得寐用六君子湯加白芍鉤藤飲食
進而漸安

萬密齋治一婢臨月病口眼喎邪腰背反張手足攣曲
不省人事用黃連解毒湯加硃砂幹開口灌之稍定
其夜生一男產後猶昏迷不省以七珍湯與之即安

據萬云
即子癇

妊娠子癇與痙病畧同

薛立齋治一妊婦出汗口噤腰背反張時作時止此怒

動肝火也用加味道遙散漸愈又用鈎藤散而止更以四君加鈎藤山梔柴胡而安

一妊婦因怒仆地良久而甦吐痰發搐口噤項強用羚羊角散漸愈更用鈎藤散始痊又用歸脾湯而安

孫文垣治黃氏婦青年初妊已及彌月忽午夜口中奴奴因作上視角弓反張裸程不知羞恥口眼偏斜昏憤不知人事問之不能言此風痰為怒所動而成子癇當從雲箕子葛根湯加大腹皮一兩劑可愈也用

葛根貝母丹皮防風川芎當歸茯苓桂心澤瀉甘草

各二錢獨活人參各四錢水煎飲之而甦

原注按貝母令人易

產未臨月者用升麻代之

陸肖愚治謝四府女與夫俱在青年妊將七月日間因責婢大怒又與夫反目號哭半日夜即不能寐至夜半忽口中譫語不已目上視竟于牀褥中裸形而出其夫力抱之遂昏憤不知人事問之不語醫不識何病或以為崇謝公夜起著紅袍執劍壓之而號叫笑

詈千端萬狀召診悉其症乃令數婦執而脈之六部
洪數有力曰此子癰症非祟也症亦時見但此殊甚
耳用真正霞天麴貝母黃連山梔天麻青皮白芍龍
膽草青黛加燈心竹瀝一劑而和二劑減半四劑全
瘳問其病狀毫不知也

吳橋治程鈞妻孕且四月矣著屐而履橋版偶失足仆
地扶起則目上視而暝昏憤而為鬼言迎橋視之寸
口脈動而微尺脈按之不絕右差勝曰非直病易去

也胎且安主生男聞者愕然乃以大劑參耆加安神
寧志僅服過半舒氣一聲而目微開問之則歷歷所
遇皆亡者言畢復瞑復進前藥乃甦日漸得安七日
而愈或問向者榆村程氏婦與此同而彼七日死何
也橋曰往者吾不及見無敢以口給臆之今病者故
中氣虛妊子食母血盡母失所養而震驚出其不虞
氣下陷而火上炎痰壅心絡故憤憤欲死非真死也
又謂見鬼物者何經云脫陽者見鬼此無足怪



續名醫類案卷三十三